




*Senin, 20 Mei 2024*  
**Ogen: Matius 2: 13-15**



**Ngungsi**



**A**di ibere Tuhan kita ndalani dalam si tempa-tempa metahat, situhuna Tuhan paksana erbahan kenangen pengalaman geluh erdalan ras IA, sabap i bas Tuhan la lit si metahat.

Senina Moria kekelengen Tuhan, labo terbayangkan uga latihna akap Maria ras Jusup i bas bena-bena perjabunna, terlebih-lebih kenca ketubuhan Jesus. Kenca anak e tubuh, kenca reh kalak Majus ku Betlehem inganna tubuh, i je minter ndarat perintah guna munuh kerina anak-anak i teruh dua tahun. I bas kebiaren e, isuruh Tuhan ka pasangen enda maba anakna si kitik denga mengongsi ku Mesir. Engkai maka Mesir, Mesir e ndauh dingin labo lit kade-kade man jumpan i je. Sipemena, enda me cara Tuhan nggenepi nubuatan kerna Jesus (Hosea 11:1). Sipeduaken, enda jadi ujian iman Maria ras Jusup, seh i ja ia ngendesken geluhna dingin masangkan ketaatenna man Tuhan. Si terakhir, Mesir e i darat kekuasaan Herodes, tapi radu jajahan Roma, ertina ingan e steril arah ancamen tapi tetap lit kemudahen guna seh ku ingan e.

Bage me kimawen dalam geluhta ibahan Tuhan. Lit hal-hal si ibuat i bas kita. Kita arus lawes, "mengungsi" arah kenyamanan, terlempar arah komunitas ntah e pertemanen ras keluarga perbanken sada-sada hal. Reaksi pertama adi kita ipaksa "mengungsi" banci ceda ateta, kemamangen, gentar kerna masa depanta. Tapi arah ogenta si idah, maka kujapa pe kita lit i je sada rencana Dibata si tetap erdalan, i tengah-tengah pengungsian lit nge kemalaman ate ras kemudahen isediaken Tuhan, dingin nehenlah maka kita iungsiken Tuhan e me gelah kita imurniken. Sada perlindungan ibahan Tuhan arah kejahatan, kemaciken ras lingkungan si la sehat man banta. Lit sura-sura Dibata si mehuli bas kegeluhenta subuk paksa siugapana pe.

*✠ Amin pe bas situasi mberat ras la jelas, tetaplah pelebe Dibata*